

**REGIONAL NEWS UNIT
ALL INDIA RADIO, AGARTALA
Date: 17-08-2017
Time: 07:55-08:05 PM Hrs
BENGALI EVENING BULLETIN**

Headlines :

- ১) দিল্লিতে স্থাপিত হচ্ছে উত্তর-পূর্বাঞ্চল সাংস্কৃতিক ও তথ্য কেন্দ্র। জানালেন ডোনার মন্ত্রী।
- ২) প্রধানমন্ত্রী উজ্জ্বলা যোজনায় এখন থেকে পেট্রোল পাম্পে বিক্রি হবে এল.ই.ডি বাস্ব, টিউব লাইট, সিলিং ফ্যান।
- ৩) জলের ট্যাক সংস্কার করতে গিয়ে কৈলাসহরে দুই জন শ্রমিকের মৃত্যু।
- ৪) যুবা উদ্যোগ-পতিদের সাথে প্রধানমন্ত্রীর মত বিনিময়।

0000000000

ডোনার মন্ত্রী:

উত্তর-পূর্বাঞ্চল সাংস্কৃতিক ও তথ্য কেন্দ্র খুব শীঘ্রই দিল্লিতে স্থাপিত হবে। একথা জানান উত্তর-পূর্বাঞ্চল উন্নয়ন মন্ত্রকের স্বাধীন দায়িত্বপ্রাপ্ত মন্ত্রী ডক্টর জিতেন্দ্র সিং। সাংবাদিকদের জানান, উত্তর-পূর্ব ভারতের মানুষদের কাছে এটা হবে একটা নতুন উপহার। তিনি বলেন, প্রধানমন্ত্রী নরেন্দ্র মোদীর নেতৃত্বে কেন্দ্রীয় সরকার যে উত্তর-পূর্বাঞ্চলকে বিশেষ অগ্রাধিকার দিচ্ছে, তারই সূত্র ধরে এই উদ্যোগ।

তিনি বলেন যে, এই কেন্দ্রটি দিল্লিতে উত্তর-পূর্বাঞ্চলের সাংস্কৃতিক এবং সম্মিলনী ও তথ্য কেন্দ্র হিসেবে কাজ করবে। এই কেন্দ্রটি আন্তর্জাতিক মানের করে নির্মাণ করা হবে এবং এখানে উত্তর-পূর্বাঞ্চলের বিষয় নিয়ে লিখিত বইয়ের গ্রন্থাগার ও পাঠাগার, উত্তর-পূর্বকে উপস্থাপিত করার বিষয় সম্বলিত চিত্রশালা ইত্যাদি থাকবে। এই প্রকল্পটি আগামী ১-২ বছরের মধ্যে সম্পন্ন হয়ে যাবে বলে তিনি জানান এবং এর জন্য প্রায় ৫০-৫৫ কোটি টাকা ব্যয় হবে।

0000000000

পেট্রোল পাম্প:

এখন থেকে দেশের পেট্রোল পাম্পগুলোতে শক্তি সাশ্রয়কারী এল.ই.ডি বাল্ব, টিউব লাইট এবং সিলিং ফ্যান বিক্রি করা হবে। ক্রেতারা পেট্রোল পাম্প থেকে ৭০ টাকায় এল.ই.ডি বাল্ব, ২২০ টাকায় টিউব লাইট এবং ১২০০ টাকায় পাঁচ তারকা সম্পন্ন সিলিং ফ্যান ক্রয় করতে পারবেন। এনার্জি এফিসিয়েন্সি সারভিসেস লিমিটেডের সঙ্গে আজ নতুন দিল্লীতে এ সম্পর্কিত বিষয়ে ইন্ডিয়ান অয়েল কর্পোরেশন লিমিটেড, হিন্দুস্থান পেট্রোলিয়াম কর্পোরেশন এবং ভারত পেট্রোলিয়াম কর্পোরেশন লিমিটেডের মৌ স্বাক্ষরিত হয়। কেন্দ্রীয় পেট্রোলিয়াম মন্ত্রী ধর্মেন্দ্র প্রধান জানিয়েছেন, দেশের ৫৩ হাজার পেট্রোল পাম্পে আগামী ছয় মাসের মধ্যে এগুলো পাওয়া যাবে। প্রধানমন্ত্রী উজ্জ্বলা যোজনায় সারাদেশে ২৫ কোটি এল.ই.ডি বাল্ব, ৩০ লক্ষ টিউব লাইট এবং ১১ লক্ষ শক্তি সাশ্রয়কারী ফ্যান সরবরাহ করা হবে। উল্লেখ্য, ২০১৫ সালের জানুয়ারী মাসে এই প্রকল্প চালু হয়।

0000000000

মন কি বাত:

প্রধানমন্ত্রী নরেন্দ্র মোদী আগামী ২৭ আগস্ট ‘মন কি বাত’ অনুষ্ঠানে তার চিন্তা ভাবনা দেশবাসীর সঙ্গে ভাগ করে নেবেন। এটি ‘মন কি বাত’ অনুষ্ঠানের ৩৫তম সংস্করণ। এক টুইট বার্তায় প্রধানমন্ত্রী নরেন্দ্র মোদী দেশবাসীকে MY GOV OPEN FORUM বা নি:শুল্ক ১৮০০-১১-৭৮০০ নম্বরে ফোন করে ইংরেজি বা হিন্দি ভাষায় তাদের বার্তা রেকর্ড করতে বলেছেন। এস এম এসের মাধ্যমেও জনগন তাদের মতামত জানাতে পারবেন।

0000000000

মৃত্যু:

জলের ট্যাঙ্ক সংস্কার করতে গিয়ে কৈলাসহরে দু’জনের মৃত্যু হয়েছে। আহত হয়েছেন একজন। ঘটনাটি ঘটে আজ সকাল সাড়ে এগারোটা নাগাদ। জানা গেছে, কৈলাসহরের পাইতুরবাজার মহাদেব বাড়ি সংলগ্ন জনৈক দিলীপ দে’র বাড়িতে আন্ডারগ্রাউন্ড জলের ট্যাঙ্কের সংস্কার কাজ করতে গিয়ে এই বিপত্তি ঘটে। বিষাক্ত গ্যাসের কারণে মৃত্যুর ঘটনায় ওই এলাকায় শোকের ছায়া নেমে আসে। নিহতরা হলেন, নির্মান শ্রমিক আব্দুল গনি চৌধুরী। অপর-জন হলেন, ধর্মনগরের বিক্রম দে।

গুরুতর আহত অপর নির্মান শ্রমিক আব্দুল মালিক এখন কৈলাসহর জেলা হাসপাতালে চিকিৎসাধীন। ঘটনার খবর পেয়ে জেলাশাসক প্রমথ রঞ্জন ভট্টাচার্য, মহকুমা শাসক সুরত চৌধুরী, পুলিশ, দমকল ও বিপর্যয় মোকাবিলা বাহিনী অকুস্থলে আসেন।

মহকুমা শাসক সুরত চৌধুরী জানান, আহত ব্যক্তির চিকিৎসার সম্পূর্ণ ব্যয়ভার নেবে প্রশাসন। সরকারী নিয়ম অনুসারে নিহতদের নিকটাত্মীয়দের আর্থিক সহায়তা দেওয়া হবে।

00000000000

বদবদল:

রাজ্য সরকারের প্রিন্সিপ্যাল সেক্রেটারী লোকরঞ্জন কেন্দ্রীয় সরকারের অর্থমন্ত্রকে যুগ্ম-সচিব পদে ডেপুটেশানে চলে যাচ্ছেন। কেন্দ্রীয় সরকারের ডেপুটেশান শেষে প্রিন্সিপ্যাল সেক্রেটারী হিসেবে রাজ্য প্রশাসনে যোগ দিচ্ছেন মনোজ কুমার। এই পরিপ্রেক্ষিতে প্রশাসনের শীর্ষস্থরে কিছু দপ্তর পূর্ণবন্টন করা হয়েছে। প্রিন্সিপ্যাল সেক্রেটারী ড: রাকেশ সারওয়ালের দায়িত্বে থাকবে পরিকল্পনা, সাধারণ প্রশাসন, কারা ও অগ্নি-নির্বাপক ব্যতিত স্বরাষ্ট্র দপ্তর। তাছাড়া

তিনি মুখ্যমন্ত্রীর প্রিন্সিপ্যাল সেক্রেটারীর ও দায়িত্বে থাকবেন। প্রিন্সিপ্যাল সেক্রেটারী মনোজ কুমারের দায়িত্বে থাকবে নগর উন্নয়ন ও পর্যটন দপ্তর। সচিব শ্রী শান্তনু'র হাতে থাকবে কারা, সাধারণ প্রশাসনের পার্সোনেল এন্ড ট্রেনিং ও পূর্তদপ্তর। তাকে স্বরাষ্ট্র সচিবের দায়িত্ব থেকে অব্যাহতি দেয়া হয়েছে।

00000000000

বন্যা:

বন্যার জল বাড়ি-ঘর থেকে নেমে গেলেও বহু স্থানে অস্বাস্থ্যকর পরিস্থিতির কারণে অনেক পরিবার বাড়ি ঘরে ফিরে যেতে পারছেন না। পশ্চিম জেলায় বর্তমানে ৭টি ত্রান শিবির এখনো রয়েছে। প্রতাপগড়ের ঋষি কলোনী, অঙ্গনওয়ারীকেন্দ্র, রাধানগর কনস্ট্রাকশন বিল্ডিং, রাধানগর জিউ মন্দির, মহাবীর ক্লাব, ভাটি অভয়নগরের হাসেম আলী জেবি স্কুল এবং কাশেম আলী জেবি স্কুলের ত্রান শিবির গুলি থেকে শরণার্থীরা আগামী দুয়েকদিনের মধ্যে বাড়ি ফিরতে পারবেন বলে মহকুমা প্রশাসন সূত্রে জানা গেছে।

00000000000

বাদল চৌধুরী বৈঠক:

রাজ্য সচিবালয়ে আজ স্বাস্থ্য দপ্তরের এক পর্যালোচনা বৈঠক অনুষ্ঠিত হয়। বৈঠকে পৌরহিত্য করেন স্বাস্থ্য মন্ত্রী বাদল চৌধুরী। বৈঠকে স্বাস্থ্য সচিব, স্বাস্থ্য অধিকর্তা সহ রাজ্যের সমস্ত জেলা এবং বিভাগের স্বাস্থ্য আধিকারিকগণ উপস্থিত ছিলেন। রাজ্যের হাসপাতাল গুলিতে স্বাস্থ্য পরিষেবা যাতে যথাযথভাবে রোগীদের দেওয়া হয় সে ব্যাপারে গুরুত্ব আরোপ করা হয়। হাসপাতালগুলিতে যে কোন বিষয়ে ঘাটতি থাকলে সে দিকে বিশেষ নজর দিতে স্বাস্থ্য মন্ত্রী নির্দেশ দিয়েছেন। এছাড়া বিভিন্ন স্বাস্থ্য প্রকল্পের বরাদ্দকৃত অর্থ সঠিক সময়ে ব্যয় করার উপরও গুরুত্ব দেওয়া হয়।

00000000000

PM:

নতুন ভারত গঠনে প্রধানমন্ত্রী নরেন্দ্র মোদী আজ দেশের যুব উদ্যোগ-পতিদের সঙ্গে মত বিনিময় করেছেন। নীতিআয়োগ আয়োজিত মতবিনিময় সভায় প্রধানমন্ত্রী বলেন এখন পর্যন্ত যাদেরকে পদ্ম-পুরুস্কারে সম্মানিত করা হয়েছে তারা নীরবে নিভূতে জনগনের কল্যাণে

সফল ভাবে দৃষ্টান্তমূলক কাজ করছেন। তিনি জাতীয় শক্তিকে জাতীয় বিকাশের সাথে যুক্ত করার উপর গুরুত্ব দেন। প্রধানমন্ত্রী বলেন এটা দুর্ভাগ্যজনক যে দুর্নীতি প্রতিষ্ঠানিক চেহারা নিয়েছে। এখন সময় এর পরিবর্তন করা। তার সরকার এর মধ্যে মধ্যস্বভোগীদের দূরে সরিয়ে দিতে পেরেছে। সর্বাত্মক উন্নয়ন ও বিকাশ সুনিশ্চিত করতে নবীন দুই শর্তাধিক শিল্পদ্যোগীদের সাথে তিনি কথা বলেছেন। ২০২২ সালের মধ্যে নতুন ভারত গঠন, ডিজিট্যাল ইন্ডিয়া, স্বাস্থ্য, শিক্ষা ও দক্ষতা বিকাশের উপর তিনি জোর দিয়েছেন।

00000000000

কৃমিনাশক:১

জাতীয় কৃমিনাশক কর্মসূচি অভিযানের নির্ধারিত সূচী অনুসারে আজ রাজ্যের সব জায়গায় এক বছর বয়স থেকে ১৯ বছর বয়সী শিশু ও কিশোর কিশোরীদের কৃমিনাশক ওষুধ খাওয়ানো হয়। উল্লেখ্য গত ১০ই আগষ্ট জাতীয় কৃমিনাশক দিবস উপলক্ষ্যে রাজ্যের সব স্থানে কৃমিনাশক ওষুধ খাওয়ানো হয়। ঐদিন যারা এই ওষুধ খান নি তাদের জন্য আজ নির্ধারিত কর্মসূচি

ছিল। এই কর্মসূচি অনুসারে আজ সর্বত্র এই অভিযান চালানো হয়।

00000000000

কৃষি নাশক: ২

ঊনকোটি জেলার কৈলাশহর ও কুমারঘাট মহকুমাতেও আজ দিবসের নির্ধারিত কর্মসূচি হয়। স্বাস্থ্য দপ্তরের নোডাল অফিসার ডা: অয়ন রায় জানান, গত দশই আগস্ট কৃষিমুক্তি দিবসে ঊনকোটি জেলাতে প্রায় বাহাত্তর শতাংশ সফলতা ছিল। আজ বাকি ২৮ শতাংশের কৃষিনাশক ট্যাবলেট খাওয়ানোর লক্ষ্যমাত্রা নিয়েই কর্মধারা রূপায়িত হয়েছে।

00000000000

এন.এফ. রেলওয়ে:

বন্যায় ক্ষতিগ্রস্ত রেল লাইন ও রেল ব্রীজ মেরামতির জন্য এন.এফ. রেলওয়ে কর্তৃপক্ষ যুদ্ধকালীন তৎপরতায় কাজ শুরু করেছে। বহু ট্রেন বাতিলের ফলে অপেক্ষমান যাত্রীদের জন্য গুয়াহাটি স্টেশনে স্বাস্থ্যশিবির খোলা

হয়েছে। গুয়াহাটি থেকে ডালখোলা ও ডিব্ৰুগড় থেকে গুয়াহাটি রুটে বিশেষ ট্রেন চলাচল শুরু করেছে। লামডিং ডিভিশনে শিলঘাট – জাখালাবান্দা’র মধ্যে রেল লাইন সংস্কারের পর নিয়ন্ত্রিত গতিতে ট্রেন চলাচল শুরু করেছে।

00000000000

Sanksritik Chetana Mancha:

রাজ্যে নতুন সাংস্কৃতিক সংগঠনের আত্মপ্রকাশ ঘটল আজ। সেই সঙ্গে নতুন সাহিত্যপত্র উত্তরনেরও আত্মপ্রকাশ ঘটেছে। আজ সন্ধ্যায় আগরতলার রবীন্দ্রশতবার্ষিকী ভবনে এক অনুষ্ঠানের মধ্য দিয়ে নতুন সাংস্কৃতিক সংগঠন “ সাংস্কৃতিক চেতনা মঞ্চ”-এবং সাহিত্য পত্র উত্তরনের আত্মপ্রকাশ করা হয়। বিজেপি রাজ্য সভাপতি বিপ্লব কুমার দেব প্রদীপ জ্বালিয়ে অনুষ্ঠানের উদ্বোধন করেন। সেই সঙ্গে ত্রিপুরা বিশ্ববিদ্যালয়ের প্রাক্তন উপাচার্য অরুনোদয় সাহা সাহিত্যপত্র উত্তরনের আবরন উন্মোচন করেন।

00000000000

আসাম রাইফেলস:

আসাম রাইফেলসের চার নম্বর ব্যাটেলিয়ানের ২১ নম্বর সেক্টরের উদ্যোগে আজ গোমতি জেলার কিল্লা ব্লকের খেলাকুমে ম্যালেরিয়া ও জলবাহিত রোগ থেকে রক্ষায় এক সচেতনতামূলক আলোচনা অনুষ্ঠিত হয়। ঐ সচেতনতামূলক আলোচনায় ১১০ জন গ্রামবাসী অংশ নিয়েছেন। পরে গ্রামবাসীদের মধ্যে ম্যালেরিয়া প্রতিরোধক ওষুধ সরবরাহ করা হয়।

0000000000

বনমহোৎসব:

কৈলাসহর মহকুমার গৌরনগর ব্লকভিত্তিক বনমহোৎসব আজ ব্লক প্রাঙ্গণে অনুষ্ঠিত হয়। উদ্বোধন করেন, ঊনকোটি জিলা পরিষদের সভাধিনেত্রী কল্পনা দেবনাথ।

এখানে বিভিন্ন বক্তা তাঁদের ভাষণে জীবনের সঙ্গে বনের নিবিড় সম্পর্কের কথা উল্লেখ করে ব্যাপক বনসৃজনের কথা বলেন।

স্বাগত ভাষণ দেন, বিডিও বিনয় ভূষণ দাস। অন্যান্যদের মধ্যে পঞ্চায়েত সমিতির চেয়ারপার্সন শান্তি

সিংহ, ভাইস চেয়ারম্যান ইনুচ মিঞা, খাদিম, জেলাশাসক
প্রমথ রঞ্জন ভট্টাচার্য্য প্রমুখ ভাষণ দেন।

00000000000

ফুটবল:

ঘরোয়া দ্বিতীয় ডিভিশন ফুটবলের আজকের খেলায়
টাউন ক্লাব জয়লাভ করেছে। আস্তাবলের স্বামী
বিবেকানন্দ ময়দানে অনুষ্ঠিত খেলায় টাউন ক্লাব ৪-০
গোলে ফ্রেন্ডস ইউনিয়নকে পরাজিত করে। বিজয়ী টাউন
ক্লাবের পক্ষে চারটি গোল করে প্রীতম সরকার, দেবু
হরিজন, লাল এং মুইয়া ডার্লং ও সাবির আহমেদ।

00000000000

ক্রিকেট:

আগামী ২০ আগস্ট বেলা সাড়ে ১১টায় এক অনুষ্ঠানের
মধ্য দিয়ে মুখ্যমন্ত্রী মানিক সরকার নরসিংগরের টি
আই টি মাঠে আন্তর্জাতিক মানের ক্রিকেট স্টেডিয়াম
নির্মানের শিলান্যাস করবেন। আজ টি সি এ অফিসে
এক সাংবাদিক সম্মেলনে টি সি এ সভাপতি রনজিৎ

মজুমদার এই কথা বলেন। টি তিনি জানান, ওই অনুষ্ঠানে শিক্ষামন্ত্রী তপন চক্রবর্তী ও ক্রীড়া মন্ত্রী সহিদ চৌধুরী উপস্থিত থাকবেন। সেইসঙ্গে ওই অনুষ্ঠানেই ২০১৫-১৬ মরশুমের পুরস্কার বিতরণী অনুষ্ঠানও করা হবে।

00000000000

আবহাওয়া:

আগামী ২৪ ঘন্টায় আকাশ-আংশিক মেঘাচ্ছন্ন থাকবে। কিছু কিছু স্থানে বজ্র-বিদ্যুৎসহ বৃষ্টিপাতের সম্ভাবনা রয়েছে। তাপমাত্রা সর্বোচ্চ ৩৩ ডিগ্রী এবং সর্বনিম্ন ২৬ ডিগ্রী এর আশপাশে থাকবে। আজ দিনের তাপমাত্রা ছিল সর্বোচ্চ ৩৩ দশমিক চার ডিগ্রী এবং সর্বনিম্ন ২৫ দশমিক আট ডিগ্রী সেলসিয়াস।

00000000000

00000000000